

DE LAPTOP

Auck Peanstra

'Jonges, dit is Bart. Bart komt bi'j oons in de klasse.'

Ni'jsgierig laoten de kiender heur ogen over de jonge gaon, die naost meester staot. Meester had d'r al over verteld, Bart hiet hi'j, en hi'j is bliend. Eerst het hi'j een peer jaor op een specia-ole schoele veur blienden zeten, mar daor het hi'j now zovule leerd dat hi'j him op een gewone schoele redden kan.

'Hi'j liekt hiel gewoon,' fluustert Menno zien buurjonge in et oor.

'Wat zegt Menno?' vragt meester.

Menno krigt een kleur.

'Eh, ik zee, daj' hielendal niet zien kunnen dat hi'j bliend is,' staemelt Menno.

'Nee,' zegt Bart gepikeerd, 'ik bin ok niet debiel!'

'Now, now,' zegt meester, 'zo kan et ok wel, niet Bart? Mar ik heur et wel, ie kun je zels wel redden. Nog evenpies wat over dat koffertien dat Bart bi'j him het. Daor zit zien komputer in, dat is een laptop, daor moe'n jim goed omme daenken. Bart moet op schoele alles mit die laptop doen, hi'j zet et gewone schrift omme in braille.'

De kiender nikken, meester het et al zo vaeke zegd, ze weten et now zo staorigan wel.

'Gao mar zitten, Bart, naost Joke. Joke wodt eerst jow rechterhaand. As we naor et videolekaol of zo gaon, moet zi'j jow brengen.

'Ok sadistisch, niet?' lacht Jelmer, 'naor et videolekaol! Hi'j is omme bliend!'

'Mar ik bin niet doof!' bit Bart weeromme. 'Ik heb de eerste vuuf jaor wel zien kund, ik weet wel wat et is, heur!'

Jelmer kropt wat in mekeer, die Bart is niet benauwd! Nog mar krek op schoele en hi'j gefit voten-daolik iederiene al een grote bek!

Meester gefit wark op en al gauw wodt et stille in de klasse. Now en dan kieken ze es naor Bart, mar vule is d'r niet te zien en al gauw bin ze wend an et geluud van zien toetsen van de kompu-ter.

'Ie bin mar mooi klaor mit Bart,' gniest Jannie een peer daegen laeter.

'Waj' mar mooi klaor numen,' prottelt Joke. 'Zo aorig is dat niet, heur. As ik him naor een eer lekaol brengen moet, knipt hi'j mi'j mit opzet hiel veniendig in de aarm. Ik heb d'r al blauwe plakken van. En hi'j lat opzettelik dingen op 'e grond valen, die ik dan weer opziken moet. En weej' wel wat hi'j ok dot? Hi'j smit altied mien spullegies van de taofel, hi'j zegt dat hi'j et niet helpen kan. Mar neffens mi'j dot hi'j et mit zin. Ik vien et mar een grote klier! Wil ie mit mi'j ruilen?'

Jannie schuddet mit et heufd.

'Nee, bedaankt!'

Op een middag is meester een dreug geschiedenisverhael an et vertellen. De meeste kiender luusteren niet. Joke kikt es op 'e zied naor Bart, hi'j is drok an et typen. Wat een uutslover, daenkt ze. Ze leunt wat aachterover om op Bart zien computerschaarm lezen te kunnen. Nao een posien begint ze te nokkeren, ze krigt d'r een rood heufd van.

'Oei, Bart, wat type ie daore,' zegt ze zachies.

Bart schrikt.

'Waar bemuui ie je mit! Kiek veur je, tutteblei!'

Meester heurt heur praoten.

'Bart en Joke, wat is d'r an de haand?'

'O wee, aj' et zeggen,' sist Bart.

Hi'j dri'jt an een knoppien en et scharm wodt inienen donker. De tekst is niet meer te lezen.

'Joke?' zegt meester streng.

'Ow, eh, ik vreug Bart wat hi'j an et typen was.'

Meester kikt naor Bart.

'En wat typte Bart?'

'Ik maek antekenings, meester, van wat jow vertellen!'

Meester glimkt een betien.

'Goed, Bart, hiel goed.'

Meester gaot weer veerder mit et verhael.

'Daor was niks van waor, heur,' vertelt Joke laeter as de schoele uut gaot en ze mit heur vrundinnen naor huus toe lopt. 'Weten jim wat Bart an et typen was? Hi'j maekte een goor verhaeltien mit allegere smerige woorden! Wat een seksist! Hi'j mag dan wel bliend wezen, mar hi'j is goed mit van alles op de hoogte!'

Een peer daegen laeter kriegen ze een rippetisie van geschiedenis, ze hebben et thuus leren moeten. Meester dielt de vraogen uut en gefit Bart een speciaal formelieer in brailleschrift. Joke lest de vraogen over. Ze schrikt aorig, d'r bin mar een peer vraogen daor ze et antwoord op wet. Van de ere vraogen wil heur niks in et zin schieten. Ze had et toch beter leren moeten! Krampachtig perbeert ze te bedaenken wat meester d'r over verteld het. Mar dat gefit heur ok al niks, dat was ja die keer dat Bart zien seksverhaelties op de komputer typte. Meester zol reer opkieken, as ze dat op heur rippetisiepepier zette! Ze strekt de rogge even en kikt om heur henne. Alle kiender zitten drok te schrijven, die weten et wel! Bart ok zo te zien, zien vingers vliegen temeensen over et toetsebod. Now en dan vuult hi'j over et strippien, dat d'r onder uut rollen komt. Spietig dat Joke gien braille kent, dan kon ze mooi spieken. Mar misschien wil Bart heur wel even helpen, ze helpt him op 't laest ok zo vaeke!

Joke schoft heur stoel een betien dichter naor Bart toe. Bart vernemt d'r niks van, hi'j typt mar deur.

'Pst, Bart, wat is et antwoord op vraag viere?'

Bart heurt niks en Joke perbeert et nog es. Bart zien vingers blieven even stille liggen.

'Stik mar!' sist hi'j heur toe.

Een betien sneu buugt Joke heur weer over heur wark. Die stomme rotjonge! Ze bit op heur penne omme, dat wodt een drieje! Krigt ze schielik thuus weer op de donder! Inienend komt heur wat in 't zin. Ze dri'jt heur heufd weer naor Bart toe.

'Hee, Bart,' fluustert ze dan. 'Bart, ie hebben je schaarm niet donker maekt, ik kan alles lezen!' Van poere schrik hooft Bart op mit typen en dri'jt an een knoppien. Hiele zinnen verschienen op et beeldschaarm. Joke kan de antwoorden die Bart typt het, zo lezen. Bart het d'r niks van in de gaten en is al weer drok doende. Joke glimkt en begint te schrijven. Ze hooft meester goed in de gaten, hi'j mag et niet zien! Mar goed dat ze aachter in de klasse zitten, niet iene het wat deur. Bart het geschiedenis goed leerd, alle vraogen wet hi'j, zicht Joke.

Dan is Bart klaar. Hi'j haelt de diskette uut de komputer en brengt die naor meester. Joke waacht nog even en dan schoft ze heur stoel aachteruut en brengt heur rippetisie ok vot. Ze is iene van de laesten. Et is tied en de kiender redden heur taofel op. As Bart zien komputer uut doen zal, ropt Joke naor him:

'Hee, Bart, dat van dat schaarm, dat was mar een grappien, heur! En nog bedaankt veur de antwoorden, ie bin een beste jonge!'

Bart komt overaende en wil heur beet kriegen, raozend is hi'j! Mar Joke is al bi'j de deure.

'Hoj, Bart,' ropt ze. 'Tot morgen, hen.'